

## Morning Regional Dogri News Bulletin, 14 August 2024

मार्निंग डोगरी न्यूज़ बुलेटिन, समें. 09.20 Hrs

<><><><><><>

### Headlines

- 1- जम्मू प्रांतै दे पत्नीटॉप दे जंगली इलाके च टाक्करा शुरू होई गेदा ऐ, होर जानकारी गी बलगेया जा'रदा ऐ।
- 2- राष्ट्रपति द्रौपदी मुर्मू होर 78में स्वतंत्रता दिवस दी पूर्व संझा अज्ज 7 बजे राष्ट्र गी संबोधित करंगन।
- 3- पुलस महानिदेशक आर.आर स्वैन होरें स्वतंत्रता दिवस कोला पैहले पूरे जम्मू-कश्मीर च सुरक्षा हालात दा जायजा लैता।
- 4 तिरंगा रैलिंगं दे चलदे इनें दिनें समूलचे जम्मू-कश्मीर च चौन्ने बक्खी देशभक्ति दा जोश दिक्खने गी लब्बा'रदा ऐ।

<><><><><><>

### Batote-Patnitop

जम्मू खिते दे पत्नीटॉप इलाके च जंदी रातीं सुरक्षाबलें ते आतंकवादिगं बश्कार टाक्करा भखी पेआ। खिते च पिच्छले चऊं दिनें दरान होए दा एह चौथा टाक्करा ऐ। फौज दी White Knight कोर दे इक प्रवक्ता मुजब आतंकवादिगं दे सफाए लेई सुरक्षाबलें दे अभियान बरोबर जारी न। आतंकवाद रोधी इस अभियान गी ऑपरेशन अस्सर नां दिता गेआ ऐ। जंदे शनिवार थमां आतंकवादिगं खलाफ चलाया गेदा एह चौथा अभियान ऐ। जंदे शनिवार थमां सुरक्षाबलें ते

आतंकवादिएं बश्कार अनंतनाग, किशतवाड़ ते उधमपुर च आमना-सामना होई चुके दा ऐ। फौज दे इनें अभियानें दा मकसद खिते च सुरक्षा ते रमानदारी यकीनी बनाने दे कन्नोकन्नी होरनें सुरक्षा एजेसिएं कन्ने तालमेल बनाइये कम्म करना बी ऐ। सुरक्षाबलें बटोत-डोडा जरनेली शिड़कै पर खास नाका लाए दा ऐ ते होर ब्यौरे गी बलगेआ जा करदा ऐ।

<><><><><><>

### Prez. Address

राश्ट्रपति द्रौपदी मुर्मू होर 78में स्वतंत्रता दिवस दी पूर्व संझा अज्ज शार्मी 7 बजे राश्ट्र गी संबोधित करंगन। एह संबोधन आकाशवाणी दे समूलचे नेटवर्क पर प्रसारित कीता जाग ते दूरदर्शन दे सब्बनें चैनलें पर हिंदी दे ओहदे बाद अंग्रेजी च एहदा प्रसारण कीता जाग। दूरदर्शन पर हिंदी ते अंग्रेजी च संबोधन दे प्रसारण दे बाद क्षेत्रीय चैनलें पर एहदा मकामी भाशाएं च प्रसारण होग जिसले जे आकाशवाणी पर क्षेत्रीय भाशाएं च एहदा प्रसारण रातीं साङ्डे 9 बजे होग। आकाशवाणी जम्मू पर बी राश्ट्रपति हुंदे संबोधन दा डोगरी च प्रसारण रातीं 9:0 बजे कीता जाग।

<><><><><><>

### DGP-Swain

जम्मू-कश्मीर पुलसा दे डरैक्टर जनरल आर.आर स्वैन होरें प्रदेश च औंदे स्वतंत्रता दिवस आले समारोहें लेई सुरक्षा हीलें दा जायजा लैता। इस सरबंथै च लाई गेदी इक उच्च स्तरीय बैठक दरान सुरक्षा कन्ने जुड़े दे बक्ख-बक्ख हीलें जिआं निगरानी, बलें दी तैनाती ते होरनें मामलें पर

खास तौरा पर चर्चा कीती गई। पुलस, सिविल प्रशासन, केंद्री थेआरबंद पुलस बलें ते खूफिया एजेंसिएं दे आला अफसरें इस बैठका च हिस्सा लैता।

<><><><><><>

## ECI

चुनांs आयोग अज्ज गृह सचिव अजय भल्ला हुंदे कन्नै मलाटी करोग ते जम्मू-कश्मीर दी सुरक्षा स्थिति दा जायजा लैग। भारत दे मुख चुनांs आयुक्त राजीव कुमार होरें हाल च गै केंद्र शासित प्रदेश दा दौरा लाया हा ते जम्मू-कश्मीर च चुनांs सरबन्धी तैयारियें दा जायजा लैता हा। जम्मू च प्रेस कांफ्रेंस दौरान कुमार होरें जोर देइयै आखेआ हा जे आयोग जम्मू-कश्मीर च चुनां करोआने लेई बचनबद्ध ऐ। उनें आखेआ हा जे बाहरी जां फही अंदरूनी ताकतां चुनांs प्रक्रिया च खलल नेई पाई सकदियां।

<><><><><><>

## India-Australia Terrorism

भारत ते आस्ट्रेलिया नै हर किस्म दे आतंकवाद दी सख्त निंदेआ करदे होई व्यापक ते बवस्थित ढंगै सिर आतंकवाद दा मुकाबला करने च अंतर्राष्ट्री साथ-सैहयोग गी होर निग्गर बनाने दी जरूरते पर जोर पाया। कल नमीं दिल्ली च लग्गी दी आतंकवाद विरोधी भारत ते आस्ट्रेलिया दे सांझे कार्य समूह दी 14मीं बैठक परेंत एह बयान जारी कीता गोआ ऐ। विदेश मंत्रालय मुजब दौनें मुखे बन्ने पार आतंकवाद लेई परोक्ष रूप कन्नै कीती जा'रदी आतंकी कारवाई दी सख्त निंदेआ कीती। दौनें मुखे घरेलू, इलाकाई ते आलमी सतहें पर आतंकवाद दे खतरें पर बी चिर बटांदरा कीता। चर्चा दौरान आतंकवादिएं आस्सेया नमीं ते उभरदी तकनीकें दे

इस्तेमाल, आतंकवादी उद्देश्ये लेई इंटरनेट दे माड़े इस्तेमाल, कट्टरवाद ते आतंकी गतिविधिं लेई रपेआ-पैसा उपलब्ध करोआने दी माड़ी हरकते ते संगठित अपराध ते आतंकवाद बशकार संड-गंड सने होरनें मुद्दे कन्ने सरबंधत आतंकवाद विरोधी चुनौतिं गी बी शामिल कीता गेआ।

<><><><><><>

### Hajj-2025

अगले बरे हज पर जाने दी इच्छा रखने आले लोकें गी आखेआ गेआ ऐ जे एहदे लेई भारत दी हज कमेटी आस्सेया ऑनलाइन दरखास्तां मंगियां गेइयां न। अधिसूचना मुजब जेड़े बी इच्छुक लोक ऑनलाइन दरखास्तां देना चाहंदे न ओह पैहले हज नीति ते दिशा-निर्देशें गी खरी चाल्नी पढी लैन। एह सारे दिशा-निर्देश हज कमेटी दी वेबसाइट [www.hajcommittee.gov.in](http://www.hajcommittee.gov.in) पर उपलब्ध न। दरखास्तां देने दी खीरी तरीक 9 सितंबर 2024 तय कीती गेई ऐ। हज लेई आवेदन आले फार्म वेबसाइट [www.hajcommittee.gov.in](http://www.hajcommittee.gov.in) या फही हज ऐप हज सुविधा राएं भरे जाई सकदे न।

<><><><><><>

### Reasi-Tiranga

रियासी जिला प्रशासन आस्सेया कल कोड़ी थार दुनिया दे सब्बनें शा उच्चे रेल पुल पर तिरंगा रैली दा सरिस्ता कीता गेआ जेदे च समाज दे हर वर्ग थमां लोकें बड़े मते उत्साह कन्ने हिस्सा लैता जिंदे च विद्यार्थी, मकामी बसनीक, जिला ते पुलस प्रशासन दे अधिकारी बी शामिल हे। रैली च साइडे 700 मीटर लम्मा तिरंगा झंडा चुक्किये रेल पुलें दे रोआर पार जंदे लोक इक शानदार नजारा पेश करा रदे हे। इस रैली दे आकाशवाणी न्यूज जम्मू दे सोशल मीडिया प्लेटफार्म एक्स

पर पाए गेदे वीडियो गी बड़ी बद्द गिनतरी च लोक पसंद करिए इसी परतिए पोस्ट करा रदे न। जिला विकास कमिशनर विशेष महाजन होरें इस थारै पर तिरंगा रैली दे आयोजन गी सब्बनें लेई इक मानै आहली गल्ल दस्सेया ऐ।

<><><><><><>

### Tiranga-Rally Udh.

उधमपुर जिला प्रशासन आस्सेया आयोजित तरंगा रैली गी जिला विकास कौंसल दे अध्यक्ष लाल चंद ते डिप्टी कमिशनर सलोनी राय होरें झंडी दस्सिये रवाना कीता जेदे च बड़ी बद्द गिनतरी च लोकें मते उत्साह कन्नै हिस्सा लैता। स्हाड़े जिला संवाददाता अचिन दुबे कन्नै गल्ल करदे होई जिला विकास कमिशनर सलोनी राय होरें आखेआ।

### Har Ghar Tiranga Poonch

78में स्वतंत्रता दिवस दे सिलसिले च चलै करदे हर घर तरंगा अभियान दे हिस्से दे तौरा पर कल जिला प्रशासन पुंछ आस्सेया बी स्कूली शिक्षा मैहकमे दे सहयोग कन्नै इक शानदार तिरंगा साइकल रैली दा सरिस्ता कीता गेआ। जिला विकास कमिशनर यासीन मोहम्मद चौधरी होरें खेड स्टेडियम थमां रैली गी झंडी दस्सिये रवाना कीता जेदे च साइडे त्रै सौ कोला मते लोकें हिस्सा लैता। रैली दे संचालन च शामिल जेड.ई.पी.ओ पुंछ विजय कुमार ते डी.आर.जी दर्शन कुमार नै रैली गी कामयाब बनाने च सहयोग देने लेई सब्बनें दा आभार प्रगट कीता। स्हाड़े जिला संवाददाता अनुभव मिसरी कन्नै गल्ल करदे होई दर्शन कुमार होरें आखेआ।



रिक्ख ते मार्गदर्शन हेठ चलाई जा'रदी इस मुहिम तैहत सिग्नेचर कैम्पेन यानि दस्तखत अभियान दा सरिस्ता कीता गेआ जेदे च सैकड़ां बद्दे नोजवानें दस्तखत करिए नशाखोरी कोला दूर रोहने ते समाज गी नशे कोला पूरी चाल्नी मुक्त बनाने लेई अपना धेइया पक्का कीता।

<><><><><><>